





*Mbb. 47.*













7.




# Von der

Widdertauffe  
an zween Pfarherrn/  
Ein brieff.

Adar. Luth.

Wittenberg


1. 5. 2. 8.



78

Mkt. 107. (a)  
Mkt. 47. (g)







**Martinus Luther. Den virdigen lie-**  
**ben Herrn N. vnd N. meinen**  
lieben freunden ynn Christo.



**G**nad vnd fride ynn Christo  
vnserm **HERRN**. Ich weis leider fast wol  
lieben herrn/das der Baltzer Huebmohr mich  
auch vnter andern mit namen einfuret ynn  
seinem lesterlichen büchlin von der widdertau-  
ffe / als solt ich auch seines törichten synnes  
sein. Aber ich hab mich des getröstet / das nie-  
mand/widder feind noch freund / solcher seiner öffentlichen  
lügen/gleuben würde / Weil nicht allein mein gewissen hieryn  
verwaret/sondern auch mein gericht gnugsam entschuldigt  
ist/durch so viel predigt/vnd sonderlich durch die letzten Pos-  
tillen/von Epiphanie bis auff Ostern/darynn ich ia vberflü-  
ssig meinen glauben von der kindertauße an tag geben habe/  
Derhalben ichs fur vnnotig geacht/auff solch sein büchlin ant-  
worten/Denn wer wil allen leuten/ ia allen teuffeln die meul-  
er stopffen? Ich habs bisher wolerfaren / wo ich dem teuffel  
ein maul stopffe/da reisset er zehen meuler zur seiten auff/vnd  
wechst yhe lenger yhe mehr / das ichs mus(wolle odder wolle  
nicht) Gott befelhen/der darnach/wenn wir die warheit ges-  
sagt haben/ein rechter richter ist / vnd die sachen wol weis  
aus zufüren/ Wie er denn teglich thut / als wirs wol greiffen  
mögen.

Wir hie ynn vnsern Fürsten landen/haben noch nichts von  
dem geschmeis solcher prediger / Gott sey lob vnd danck ynn  
ewigkeit. Auch nichts von den Sacraments feinden/Sondern  
sind fein still vnd eintrechtig ynn der lere/glauben vnd leben/  
Gott wolt vns forder gnediglich also behueten/Amen. Der

2 ij halben



halben ich zwar für mein teil/nicht viel gedancken widder die  
teuffeler bisher gehabt/weil es hie nicht not gewesen ist. Aber  
euch Papisten (Ich mus euch so nennen/weil yhr vnter ewrem  
Tyrannen sein müisset) geschicht warlich recht/ Weil yhr das  
Euangelion nicht wollet leiden/ müisset yhr mit solchē teuffels  
Kotten zuthun haben/wie Christus spricht Johan. 5. Ich kom  
me ynn meines Vaters namen/vnd yhr nemet mich nicht an/  
Ein ander wird ynn seinem namen komen / den werdet yhr  
(das ist/die ewren bey euch) annemen. Doch ist's nicht recht/  
vnd ist mir warlich leid/das man solche elende lente/ so iemer  
lich ermordet/verbrennet vnd gewulich vmbbringt/Man solt  
ia einen iglichen lassen glauben / was er wolt/ Gleubet er vn  
recht/so hat er gnug straffen an dem ewigen feur ynn der hel  
len. Warumb wil man sie denn auch noch zeitlich martern? so  
ferne sie allein ym glauben yrrer/vnd nicht auch daneben auff  
rührisch odder sonst der oberkeit widderstreben. Lieber Gott/  
wie bald ist's geschehen/das einer yrrer wird vnd dem teuffel  
ynn strick fellet? Mit der schrift vnd Gottes wort/solt man  
yhn weren vnd widder stehen/Mit feur wird man wenig aus  
richten.

Ich weis zwar noch nicht recht / was sie für ursache vnd  
grund yhres glaubens haben/ So zeigt yhr mirs auch nicht  
an/vnd begeret doch rat/wie man solle sich ynn solchen sachen  
halten / Darumb kan ich nichts gewisses drauff antworten/  
So seid yhr zum teil auch selbs widderteuffer / Denn viel der  
ewern teuffen widderrumb Latinisch/die/ so Deudsch getaufft  
sind/ So doch ewer Bapst selbst solches nicht thut noch leret/  
Denn wir wissen ia wol / das der Bapst getaufft sein lesset/  
wo die weiber teuffen ynn nöten/ wenn sie gleich Deudsch teu  
ffen. Noch teuffet yhr widderrumb/so wir bey vns Deudsch teu  
ffen/ Als were vnser priester Deudsch teuffen nicht so gut/ als  
der weiber Deudsch teuffen/ Wie denn newlich der grobe kopff  
von Leipzig zu Molhausen auch gethan hat / So doch mirs  
gent der



gent der Bapst gebent / das man allein Latinisch / vnd nicht  
ynn ander sprachen teuffen solle / Darumb geschicht euch aber  
mal recht. Widderteuffen wolt yhr / so kriegt yhr widderteu-  
ffer gnug / die wolt yhr nicht leiden / vnd wolts doch selber sein  
widder ewern eigen lerer vnd meister den Bapst.

Aber wie vnrecht die ewern thun / das sie widder teuffen /  
las ich yzt faren. Denn es ist ewer schande deste grösser / das  
yhr gleich ewrem abgott dem Bapst selbs widderstrebt / mit  
ewrem widderteuffen / vnd stymmen also lerer vnd schüler nis-  
cht mit einander / Darumb wil ich dauon yzt nicht weiter han-  
deln / sondern wil euch zu dienst widder ein Papist werden /  
vnd dem Bapst getrost heucheln / Denn meine lieben schwer-  
mer werden mirs doch nicht anders deuten / (wie sie bereit  
thun) das ich dem Bapst hie mit heuchele vnd gnaden suche /  
Sintemal wer nicht yhrem tollen schwermen folget / der mus  
ein newer Papist heissen.

Auffs erst / höre vnd sehe ich / das solch widderteuffen von  
etlichen furgenomen wird aus dem grunde / dem Bapst ver-  
dries zu thun / als die nichts wollen vom Endechrist haben /  
Gleich wie die Saeraments feinde auch darumb an eitel brod  
vnd wein gleuben wollen / dem Bapst zu verdries / Vnd meis-  
nen / sie wollen damit das Bapstum recht störzen. Fürwar /  
das ist ein loser grund / darauff sie nichts gutes bawen wer-  
den. Mit der weise mussten sie auch leucken die ganze heilige  
schriff / vnd das predigamt / Denn solchs haben wir freilich  
alles vom Bapst / vnd mussten auch eine newe heilige schriff  
machen. Also mussten wir auch das alte Testament faren lassen  
auff das wir ia nichts von den vngleybigen Juden hetten.  
Warumb nemen sie denn teglich geld vnd gut an / so doch bö-  
se leute / Bapst vnd die Türcken odder kexer haben gehabt?  
Solchs solten sie auch lassen / wenn sie nichts gutes wolten  
von bösen leuten haben.

Larren werck ist das alles. Christus fand auch ym Judisch  
A iij en volck



vold der Phariſeer vnd ſchriftgelerten miſbrauch / Aber er  
verwarffs darumb nicht alles / was ſie hatten vnd lereten/  
Matth. 23. Wir bekennen aber / das vnter dem Papſtum viel  
Chriſtliches gutes / ia alles Chriſtlich gut ſey / Vnd auch daſelb  
herkomen ſey an vns / Nemlich / wir bekennen / das ym Pap  
ſtum die rechte heilige ſchrift ſey / rechte tauſſe / recht Sacra  
ment des altars / rechte ſchluffel zur vergebung der ſunde / red  
cht predig ampt / rechter Cathechismus / als das Vater vnſer  
Zehen gebot / die artickel des glaubens. Gleich wie er auch wid  
derumb bekennet / das bey vns (wie wol er vns verdampt als  
kezer) vnd bey allen kezern ſey die hilige ſchrift / tauſſe / ſchluff  
ſſel / Cathechismus 2c. O wie heucheleſtu hie? Wie heuchelich  
denn? Ich ſage was der Papſt mit vns gemein hat / So heuch  
elt er vns den kezern widerumb ia ſo ſeer vnd ſaget / was  
wir mit yhm gemein haben. Ich wil wol mehr heucheln / vnd  
ſol mich dennoch nichts helffen / Ich ſage / das vnter dem Pap  
pſt die rechte Chriſtenheit iſt / ia der rechte außbund der Chriſ  
tenheit / vnd viel frumer gröſſer heiligen. Solich auff hören  
zu heuchlen:

Höre du ſelber was S. Paulus ſagt zu den Theſſalonichern  
Der Endechriſt wird ym tempel Gottes ſitzen. Iſt nu der Pa  
pſt (wie ich nicht anders gleube) der rechte Endechriſt / ſo ſol  
er nicht ſitzen odder regiern ynn des teuſſels ſtal / ſondern ynn  
Gottes tempel. Nein / er wird nicht ſitzen / da eitel teuſſel vnd  
ungleubigen / odder da kein Chriſtus odder Chriſtenheit iſt /  
Denn er ſol ein wider Chriſt ſein / darumb muſ er vnter den  
Chriſten ſein. Vnd weil er daſelb ſitzen vnd regiern ſol / ſo muſ  
er Chriſten vnter ſich haben. Es heiſt ia Gottes tempel nicht  
ſteinhauffe / ſondern die heilige Chriſtenheit. 1. Corin. 3. daryn  
er regieren ſol. Iſt denn nu vnter dem Papſt die Chriſtenheit  
ſo muſ ſie werlich Chriſtus leib vnd gelied ſein / Iſt ſie ſein leib  
ſo hat ſie rechten geiſt / Euangelion / glauben / tauſſe / Sacra  
ment / ſchluffel / predig ampt / gebet / heilige ſchrift vnd alles  
was



was die Christenheit haben sol. Sind wir doch auch noch alle  
vnter dem Bapstum/vnd haben solche Christen güter dauon.

Denn er verfolget vns/verflucht vns/verbannet vns/ver-  
sagt vns/verbrennet vns/erwurget vns / vnd gehet mit vns  
armen Christen vmb/wie ein rechter Lndechrist mit der Chri-  
stenheit vmbgehen sol. Tu müssen fur war solche Christen/  
recht getaufft/vnd rechtschaffene glieder Christi sein/sie könd-  
ten sonst solchen sieg widder den Lndechrist durch den tod  
nicht erhalten. Wir schwermē nicht also/wie die rottē geister/  
das wir alles verwerffen/was der Bapst vnter sich hat/Denn  
so würden wir auch die Christenheit den tempel Gottes ver-  
werffen/mit allem das sie von Christo hat/Sondern das fech-  
ten wir an vnd verwerffen/das der Bapst nicht bleiben lassen  
wil/bey solchen gütern der Christenheit/die er von den Apost-  
teln geerbet hat / Sondern thut seinen teuffels zusatz da bey  
vnd druber/vnd braucht solcher güter nicht zur besserung des  
tempels Gottes/sondern zur verstorung/das man seine gepot  
vnd ordnung höher helt/denn Christus ordnung/ Wie wol  
ynn solcher zerstörung/ Christus dennoch seine Christenheit  
erhelt/ Gleich wie er Lot zu Sodom erhielt/als auch S. Pe-  
trus dauon verkündiget. 1. Petri. 2. Das also beides bleibe / der  
Lndechrist sitze ym tempel Gottes durchs teuffels würckung/  
Vnd doch gleich wol/ der tempel Gottes sey vnd bleibe Got-  
tes tempel durch Christus erhaltung. Kan der Bapst dis mein  
heuchlen leiden vnd annemen/ so bin ich freilich ein vnterthe-  
niger son vnd frumer papist/Vnd wils auch werlich mit her-  
zen freuden sein/vnd gern alles widderruffen / was ich yhm  
sonst zu leide gethan habe.

Darumb ist solcher widderteuffer vnd schwermer rede ni-  
chts wenn sie sagen/Was der Bapst hat/ist vnrecht/Edder/  
Weil ym Bapstum dis vnd das geschicht/ so wollen wirs an-  
ders haben/gerade/als wolten sie damit sich beweisen/grosse  
feinde



feinde des Endechrists/ Sehen aber nicht / das sie damit yhn  
am höchsten stercken/die Christenheit am höchsten schwächē/  
vnd sich selbs betriegen. Den misbrauch vnd zusatz solten sie  
vns helfen verwerffen / Aber da hetten sie nicht grosse ehre  
von/weil sie sehen/ das sie daran nicht die ersten sein können/  
Darumb greiffen sie an/das niemand angriffen hat / auff das  
sie auch etwa die ersten sein vnd ehre einlegen mügen. Aber die  
ehre mus zu schanden werden / Denn sie greiffen den tempel  
Gottes an/vnd feilen des Endechrists/ der drynnen sitzt/wie  
die blinden die nach dem wasser tappen/ vnd greiffen ynns  
feuer.

Ja sie thun eben wie ein bruder dem andern thet ym Dürin  
ger walde/Die giengen miteinander durch den wald/ vnd ein  
beer kompt sie an/der wirfft den einen vnter sich/ Da wil der  
ander seinem bruder helfen/sticht nach dem beern/feilet aber  
sein/vnd ersticht den bruder vnter dem beern iemerlich. Eben  
so thun diese schwermer auch/Sie solten der armen Christen  
heit helfen/die der Endechrist vnter sich hat vnd martert/  
vnd stellen sich gewolich widder den Papst / feilen aber sein/  
vnd morden die Christenheit vnter dem Papst viel iemerlich  
cher / Denn wo sie die tauffe vnd Sacrament recht liessen/  
mochten die Christen mit der seelen noch entrynnen vnter  
dem Papst/vnd selig werden/wie bisher geschehen ist. Aber  
nu yhn die Sacrament genomen werden/müssen sie wol ver  
loren werden / weil auch Christus selbs da durch weg genos  
men wird. Lieber es ist nicht also auff den Papst zu plazen/  
weil Christus heiligen vnter yhm liegen / Es gehört ein fürsich  
chtiger bescheidener geist dazu/ der vnter yhm lasse bleiben/  
was Gottes tempels ist/vnd were seinem zusatz/damit er den  
tempel Gottes zerstöret.

Auffs ander/sagt man/wie sie sich drauff grunden/das sie  
nichts von yhrer tauffe wissen/vnd sagen/ Wie weistu das du  
getaufft bist? Du gleubst menschen/die dir sagen/du seyest ges  
taufft/  
taufft/



taufft/ Aber du must Gott selber vnd nicht menschen glauben/  
Vnd also deiner tauffe gewis sein 2c. Das mag mir doch ia au  
ch ein loser fauler grund sein/ Denn so ich das alles wolt ver  
werffen/ was ich nicht selbs gesehen odder gehört habe / so  
werde ich freilich nicht viel behalten / widder glauben noch  
liebe / widder geistlichs noch weltlichs. So mocht ich auch sa  
gen/ Lieber wie weistu/ das der man dein vater / vñ die frau  
deine mutter sey? Du must nicht menschen glauben / sondern  
selbs deiner gepurt gewis sein. Wie mit weren hinfurt alle kin  
der frey/ vnd dürffen Gottes gepot nicht halten/ da er gebeut  
Du solt vater vnd mutter ehren. Den ich wolt bald sagen/ Wie  
weis ich/ welche mein vater vnd mutter sind? Menschen glau  
be ich nicht/ darumb müssen sie mich widderumb geperen von  
newen/ das ichs selbs sehe/ odder wil sie nicht ehren. So were  
Gottes gepot gar fein auffgehoben/ ganz vnd gar.

Desselbigen gleichen/ wolt ich keinen bruder/ schwester/ vet  
tern noch einigen freund kennen/ vnd ymer fürgeben/ Ich wu  
ste nicht/ das sie mir zugehöreten/ weil ich vngewis were/ wel  
che meine Eltern weren 2c. Aber solchem geist/ wolt ich (wen  
ich Herr ym lande wer) widderumb dienen/ vnd verbieten/  
das er auch kein erbe/ wider haus noch hoff/ noch einen heller  
must von seinen Eltern behalten/ gewarten noch empfangen/  
vnd wolt also seines eigens glaubens mit yhm spielen/ bis yhm  
der geiste widder zu fleisch würde / Denn weil er die Eltern  
nicht wissen noch glauben wolt/ so must er auch yhr gut nicht  
wissen noch glauben. O Welch ein fein löblich regiment würd  
da ynn der welt werden/ da niemand des andern kind/ bruder  
schwester/ vetter/ freund/ erbe noch nachbar sein wolt/ Nicht  
bessers/ denn vnter die wilden wölffe mit solchen Christen.

Item also wolt ich auch keinen Fürsten noch herrn vnter  
than sein/ vnd fürgeben/ Ich wuste nicht/ ob er Fürst geporen  
B were/



were/ weil ichs nicht gesehen hette / sondern den leuten glauben musste/ Vnd wolt also abermal ein frey gesell sein/ Gottes gebot auff heben/ vnd keine öbirkeit haben/ Sondern von leuten vnter die wolffe lauffen/ da solch gebot Gottes von eltern vnd öberkeit zu ehren/ nichts golten. Vnd zwar/ das der teuffel yn diesen teufflern solchs gerne wolte/ scheint wol an dem das solche teuffler schon bereit (als man sagt) weib vnd kind/ haus vnd hoff vorlassen / vnd schlechts allein gen hymel wollen/ Davon hernach mehr.

Ja ich wolt auch wol sagen/ die heilige schrift were nichts Christus were nichts/ Die Aposteln hetten auch nie gepredigt/ Denn solchs alles habe ich nicht gesehen noch gefület/ sondern von menschen hab ichs gehöret/ Darumb wolt ichs nicht glauben/ es würde denn alles von newen/ für meinen augen also gemacht/ gethan vnd gehandelt/ So were ich denn allererst ein rechter frey gesell/ auch von allen Gottes geboten. Da wolt ich hin/ spricht der Teuffel / wenn ich kündte / Das heist ein grund gelegt der widdertauffe/ auff das nichts bliebe/ widder ym hymel noch auff erden.

So sprichstu/ Hastu doch selbs geleret/ man solle allein Gott/ vnd nicht menschen glauben/ Trawen/ mit der weise soltestu mich wol mit meinem eigen schwerd schlagen. Weil du aber ia so zenckisch bist/ So frage ich widder/ ob man Got auch solle gehorsam sein/ da er die eltern vnd öberherrn gebent zu ehren? Sagestu/ Ja/ So antwort ich/ Wie weistu denn/ welche sie sind/ wo du menschen gar nicht glauben wilt? Wie stehstu nu? Es mangelt dir daran/ (sehe ich wol) das du nicht wilt verstehen/ was menschen glauben heist / vnd plumpst so hinein/ wie die schwermer pflegen/ Darumb höre zu.

Wenn man leret/ das wir nicht sollen den menschen glauben/ so



beit/so meinet man freilich / das sie allein menschen für sich /  
vnd nicht Gott bey yhn sey/das ist/das sie reden/als mensche  
von yhn selbst/on Gottes wort vnd werck/was sie ertichten/  
vnd können solchs widder mit Gottes worten noch wercken  
beweisen/Denn wer wolt das menschen lere heissen / die von  
Gott durch menschen wird furgetragen? Vnd wer wolt auch  
sagen/das solch glauben an solche lere/hiesse an menschen vnd  
nicht an Gott gegleubet? Denn darumb schilt Sanct Paulus  
die menschen lere/Colloss.2.das sie nie gesehen habe / was sie  
leret/das ist/Es ist erticht was sie sagt/kans auch nicht bewei  
sen mit einigem wort odder werck Gottes. Darumb wenn du  
hörest/das man menschen nicht solle glauben/so mustu es ver  
stehen/das da kein Gottes wort noch werck angezeigt noch  
beweiset wird / sondern ist ein lauter menschen geticht/auff  
das du einfeltiglich/(wie die wort lauten)menschen glauben  
scheidest/widder Gott glauben.

Vu sihe/wenn du geboren wirst/ das gehet nicht heimlich  
zu/wird auch nicht von menschen ertichtet/ Sondern es ist  
Gottes werck/das öffentlich an tag kompt/ vnd kein mensch  
widderprechen kan/Vnd obs yemand widderprechen wolt/  
wie die Jüden sich widder Christus wunderzeichen vnterstun  
den/so hats doch keinen bestand/Denn es werden doch die an  
dern obligen/so das Götlich öffentlich werck sehen vnd zeu  
gen/vnd den andern das man/mit der that vnd warheit stop  
ffen/Denn Gottes ordnung hie starck gehet / das ynn zwey  
odder dreyer zeugen mund bestehen alle sachen.Sihe/solchen  
leuten mus man warlich glauben/Denn sie zeigen das werck  
Gottes/nemlich/velne geburt/Vnd beweisen/das es von dei  
nen eltern kome / dazu so nympt sich dein niemand an/ denn  
deine eltern/sicht vnd erbeit auch niemand fur dich/on sie al  
leine/Vnd gehen also Gottes werck so öffentlich/das sie nie  
mand widderficht/auch kein Teuffel noch mensch/ Sondern  
B ij yederman



yederman so gewis weis vnd bekennet/ als er bekennet/ das du lebest.

Sihe/ das heist nicht menschen/ sondern Gott glauben/ denn man dir Gottes werck zeuget. Vnd Summa/ Wo man dir Gottes werck zeiget vnd zeuget/ vnd nicht von menschen ertichtet ist/ vnd dazu widder vom teuffel noch menschen widder sprochen wird / da gleubstu Gott vnd nicht menschen/ Denn es ist Gottes werck/ das er so öffentlich darstellet / das auch der teuffel nicht da widder kan.

Das aber etliche kinder werden zu weilen verthan vnd weg geschickt/ vnd yhr Eltern nicht gewis kennen yhr lebens lang/ Das gibt diesen sachen nichts zuschaffen / Denn wir reden hie von gemeiner Götlicher öffentlicher ordnung. Solche kinder aber werden vnredlich heimlich vnd widder Gottes ordnung gezeuget/ darumb ist nicht wunder obs auch anders mit yhn zu gehe/ Vnd wie sie heimlich gezeuget werden / also auch yhre heimliche Eltern nicht kennen mügen/ Finsternis ist/ finsternis mag bleiben/ was der Teuffel thut/ Aber Gottes ordnung gehen ym liecht.

Wenn du mich nu fragest/ Warumb ich glaube/ das der man vnd die fraw meine Eltern sind. So sage ich zu erst/ Ich bin gewis/ das ich ein Gottes werck vnd mensch bin/ vnd mus ia vater vnd mutter haben / vnd bin nicht aus eym stein gesprungen/ weil Gott Gene. 1. spricht zu den menschen/ Wachst vnd mehret euch. Daraus man mus schliessen / das alle menschen von man vnd weib komen/ das ist vater vnd mutter haben. Welchs er auch bestettigt mit seinem gebot/ da er sagt zu allen menschen/ Du solt vater vnd mutter ehren. (Christus ist billich dort vnd hie/ als Gottes son ausgenommen) Weil es nu gewis ist/ das ich menschen zu Eltern habe / vnd nicht auffm bawm gewachsen bin/ So zwinget mich zum andern weiter/  
das ich



das ich glaube/der man vnd die frawe sey es/die mir von men  
schen werden angezeigt/durch den spruch/ ynn zwey odder  
dreyer zeugen mund stehen alle sache. Da mit zwinget mich  
Gott/solchen leuten zu glauben. Zum dritten/ist das werck  
Gottes auch da/das sich niemandslynn seinem namen mein/  
als eins natürlichen kinds annimpt/ynn aller welt/denn diese  
zwey menschen/ odder ynn yhrem namen(so sie tod sind) die  
freunde odder frume leute/ Vnd solchs alles vnwidderfochten  
bleibt von teuffel vnd menschen/wie ein ander offentlich Got  
tes werck/ Denn offentliche Gottes werck kan widder welt  
noch teuffel anfechten/Vnd ob sie sichs vnterstunden/ists ni  
chts. Aber Gottes wort(weil das werck noch verborgen ist)  
kan er meisterlich anfechten.

Also das ich glaube/der man sey mein fürst odder herr / ist  
erstlich die ursache/Gottes wort spricht Roma.13. Yderman  
sey der oberkeit vnterthan. Draus ich neme/das ich mus einen  
oberherrn haben vnd vnterthan sein. Zum andern / weil alle  
welt zeuget vnd sagt/dieser sey es/vnd yederman hellt yhn da  
für/vnd niemand widder spricht/als ein öffentlich werck Go  
tes/so mus ich glauben solchen zeugen. Vnd obs yemand wid  
derspreche/so bestehets doch nicht/ yederman spricht doch zu  
letzt/Er leuget. Zum dritten / ist das offentlich werck Gottes  
da/das sich mein sonst niemand/als zum vnterthan annimpt/  
Ich lebe vnter seinem schutz/schirm/ recht vnd fride / wie es  
sein vnd gehen sol vnter der oberkeit/vnd lest mich alle ander  
oberkeit sitzen/vnd sicht mich daryn nicht an/ widder spricht  
auch nicht/Wo ich anders ym liecht mit recht vnd Götlicher  
ordnung da sitze/ Denn reuber vnd mörder mügen heimlich  
vnd finster ynn frembder hirschafft sitzen / Aber man spricht  
sie warlich an/als die nicht vnterthan daselbst sind.

Harre(sprichstu) da wil ich dir eins geben. Warumb glaub  
stu denn nu nicht/das der Papst dein herr sey? sondern machst  
den Endchrist draus/so doch alle welt zeuget/er sey das heubt

B ij der Christen



der Christenheit/ vnd beweisen dirs auch mit der that/ denn  
er sitzt ia ym regiment. Antwort / Da hettestu mich schier er/  
schnapt/ Aber las dir sage/ Wenn du diese drey stück mir kanst  
am Bapstum zeigen/ die ich dir an den eltern vnd oberkeit zei  
ge/ so wil ich das Bapstum fur Gottes werck halten vnd ger  
ne gehorsam sein/ vnd dem werck Gottes glauben/ Kanstu  
aber das nicht thun/ lieber/ so las mirs ein menschen geticht  
sein/ on Gottes wort vnd werck/ dem aller ding nicht zu glau  
ben ist. Das aber ein mensch geticht sey/ wil ich beweisen mech  
tiglich.

Erstlich/ sagt mir Gottes wort wol/ das eltern vnd ober/  
keit seien/ vnd ich solle vnd müsse eltern vnd oberkeit haben/  
wie gehört ist/ Aber kein Gottes wort ist/ das da sage/ das ein  
Bapst sey/ vnd müsse einen Bapst haben / odder dem Bapst  
vnterthan sein. Weil aber die schrift nichts vom Bapst odder  
von seinem regiment gepent / so ist auch kein Bapstum / das  
ein Göttlich werck sey/ Sintemal die schrift von Gottes wer  
cken zeugnis gibt/ Darumb ich droben gesagt habe/ Menschen  
sol man glauben/ wo sie nicht yhr geticht odder werck / son  
dern Gottes wort odder werck zeugen vnd zeigen/ Denn/ An  
te questionem/ quid est/ oportet questionē/ si est/ definire. Ehe  
man mich leret/ wer der bapst sey/ mus man mich zuor gewis  
machen/ das ein Bapst sey mit Göttlichem recht/ Wenn er a  
ber nicht sein kan/ so fragt man nicht darnach / wer er sey.  
zum andern/ ob wol viel menschen von yhm zeugen / So ist  
doch solch zeugen nicht allein vergeblich/ weil es kein Gottes  
werck aus dem Bapstum machen noch beweisen kan/ sondern  
auch nicht völlig vnd ganz/ Denn es haben bisher da widder  
gezeuget vnd widderprochen/ nicht alleine die ganze Chris  
tenheit gegen morgen / sondern auch viel vnterthanen des  
Bapsts selbs die drüber verbrand sind / vnd noch teglich er  
würget werden/ das also solch regiment noch nie ausgenommen  
vnd vnwidderprochen blieben/ odder zum rugigen stand ko  
men/



men/wie der eltern vnd oberkeit regiment/ als droben erzelet ist.

Zum dritten/ist auch kein Gottes werck da / Denn er thut kein ampt seinen vnterthanen zu nutz/ Ja er vorfolget das Euangelion vnd die Christen / schweige das ers solt leren vnd handhaben/ Er leret wol seinen dreck vnd giffet / als die menschen lere/ lest das Euangelion vnter der bandt liegen / ia er verfolget/wie wol es yhn nichts hilfft/ Er macht aus dem sacrament/opffer/aus den wercken/glaube/aus dem glauben/werck/erbeut ehe/speise/zeit/kleider vnd stete/Vnd verkeret misbraucht alle Christliche güter / zu schaden der seelen / wie wir solches alles anderswo gnugsam beweiset haben. Weil denn alle drey stück ym Papstum mangeln / so mus mans fur lauter menschen geticht haben/dem gar nichts zu glauben ist/ vnd ynn keinen weg der Eltern vnd oberkeit stand zuner gleichen.

Also hie auch/die tauffe ist ein werck Gottes/ das kein mensch ertichtet/sondern Gott befolhen vnd bezeuget hat ym Euangelio. Zum andern/sind leute die solchs von dir zeugen/das du getaufft seyest/vnd niemand widder spricht/noch beweiset das widerspiel. Zum dritten folget das werck/das man dich ynn der Christen zal rechnet/lest dich zum sacrament vnd allem Christlichem recht komen / vnd des alles gebrachen/Welches man nicht thet/wo du nicht getaufft werest/vnd nicht yederman solchs gewis were/welchs alles auch eitel zeugnis sind deiner tauffe/Denn alle welt weis vnd sibet/das man yderman teuffet/weil er ein kind ist. Wer nu diesem allem nicht glauben wolt/der thet eben so viel/als gienbet er Gott selber nicht/weil Gott selber spricht / zweyen zeugen sol man glauben. Vnd strafft auch solche zeugen nymer mehr/der doch keine falschen zeugen vngestraft vnd vngeschendet lest.

Hie mit/halt ich/sey gnug beweiset/das keiner müge an  
seiner



seiner tauffe zweiffeln/ als wisse sie nicht/ Vnd das der sündige  
an Gott/ wers nicht glauben wolt / Denn er ist viel gewisser  
seiner tauffe/ durch der Christen zeugnis/ denn ob er sie selber  
gesehen hette/ weil der Teuffel leichtlich yhn kund yrrer ma-  
chen ym kopff/ das er dechte / Er were ym trawm odder ge-  
spenst/ vnd nicht recht getaufft/ Vnd musste dennoch zu letzt  
an der Christen zeugnis sich halten vnd zu rüge stellen/ Welch  
zeugnis der Teuffel nicht also kan yrrer odder zweyffelhaftig  
machen.

Auffs dritte/ sagt man/ welchs ich denn auch gelesen habe/  
das sie sich gründen auff diesen spruch / Wer da glaubt/ vnd  
getaufft wird/ der sol selig werden. Aus dem wollen sie nemen  
das man niemand teuffen solle/ er glaube denn zuuor. Sie sa-  
ge ich/ das sie sich gar grosser vormessenheit vnterwinden/  
Denn wo sie solcher meinung folgen wollen/ so müssen sie nicht  
ehe teuffen/ sie wissen denn gewis/ das der tauffling glaube/  
Wie vnd wenn wollen sie doch das ymer mehr wissen? Sind  
sie nu zu Götter worden/ das sie den leuten yns hertz sehen kon-  
nen/ ob sie glauben odder nicht? Wissen sie nu nicht/ ob sie glau-  
ben/ warumb tauffen sie denn/ weil sie ia so hart fechten/ der  
glaube mus für der tauffe sein. Thun sie nicht fein hie widder  
sich selbs? das sie teuffen/ da sie nicht wissen / ob glaube da sey  
odderr nicht/ Denn wer die tauffe auff den glauben gründet/  
vnd tauffet auff abentheur/ vnd nicht gewis ist/ ob glaube da  
sey/ der thut nichts bessers/ denn der on glaube teuffet/ Denn  
unglaube vnd ungewisser glaube/ ist gleich viel / vnd ist alles  
beides widder diesen spruch (Wer da glaubt) welcher redet  
von gewissem glauben/ den der tauffling haben sol.

Ja sprichstu/ Er bekennet/ das er glaube 2c. Lieber las bes-  
kennen hin vnd her/ Der Text spricht nicht/ Wer da bekennet/  
sondern wer da glaubt. Sein bekenntnis hastu wol/ noch weistu  
seinen glauben nicht/ Vnd kanst damit deinem verstand nach  
diesem



Diesem spruch noch nicht gnug thun/du weiffest denn auch set  
nen glauben/weil alle menschen lügner sind/vnd allein Gott  
die hertzen kennet/Drumb wer die tauffe wil grunden auff den  
glauben der taufflinge/der mus nymer mehr kein mensch teuf  
ffen/ Denn wenn du gleich einen menschen hundert mal teuf  
ffest einen tag/dennoch weistu kein mal/ob er glaube. Was  
treibestu denn mit deinem widderteuffen/weil du widder dich  
selbs thust / vnd teuffest / da du keinen glauben gewis weiffst/  
Vnd lereest doch/der glaube müsse gewis da sein. Also stehet  
dieser spruch( Wer da gleubt ) gar star widder yhre widdert  
tauffe/ weil der spruch von gewissem glauben redet / vnd sie  
yhre widdertauffe auff vngewissen glauben gründen / vnd  
thun nicht einen buchstaben nach dem spruch.

Eben also rede ich auch vom taufflinge/wo er die tauffe  
auff seinen glauben gründet odder empfehet / Denn er ist sei  
nes glaubens auch nicht gewis. Denn ich setze gleich/ das sich  
ein man heute lasse widderteuffen/als der sich dünckt vnd an  
fechten lest/er habe nicht gegleubt ynn der kindheit/ Wolan/  
wenn morgen der Teuffel kompt/sicht sein hertz an/vnd sprit  
cht/Arwe/irtz füle ich erst rechten glauben / gestern habe ich  
warlich nicht recht gegleubt. Wolauff/ich mus mich abermal  
zum dritten teuffen lassen/vnd mus also die ander tauffe auch  
nichts werden. Meinstu der Teuffel könne solchs nicht? Ja  
lerne yhn bas kennen/Er kan wol mehr/lieber freund. Weit  
ter/wenn er nu also auch die dritten tauffe anfechte/Item als  
so fort an die vierde/on alles auff hören(wie er denn auch ym  
sinn hat zuthun ) gleich wie er mir vnd vielen gethan hat/  
mit der beichte/da wir auch einerley sünde nymer mehr kind  
ten gnug beichten/vnd ymer eine Absolution nach der ander/  
einen beichtuater vber den andern suchten on alle ruge vnd  
auff hören/Darumb das wir auff vnser beichten vns gründen  
wolten/Gleich wie sich yzt die teufflinge auff yhren glauben  
gründen



gründen/Was solt wol draus werden? Ein ewiges teuffen  
vnd kein auffhören würde draus. Darumb ist nichts/Es kan  
widdertauffer noch tauffling die tauffe auff den glauben ge-  
wis gründen/Vnd ist also dieser spruch gar viel stercker wid-  
der sie denn widder vns. Vnd das sind sie/ die nicht wollen  
den menschen glauben/die da zeugen sind yhrer tauffe/vnd hie  
glauben sie yhn selbs/als menschen/das sie getaufft seyen/Ge-  
rade als weren sie nicht menschen / odder als weren sie yhres  
glaubens gewisser/denn das zeugnis der Christenheit ist.

Darumb schliesse ich widder sie/wollen sie diesem spruch  
(Wer da glaubt) gnugthun/yhrem verstand nach/ so müssen  
sie die widdertauffe viel mehr verdamnen/denn die erst/Vnd  
kan widder tauffer noch tauffling bestehen mit seiner mei-  
nung/ Denn sie alle beide des glaubens ungewis sind / odder  
yhe zum wenigsten yn der fahr vnd anfechtung stehen/Denn  
es kompt/ia es gehet also zu mit dem glauben/das oft der/so  
da meinet/er glaube/nichts vberall glaube/ vnd widderrumb/  
der da meinet/er glaube nichts/sondern verzweinele/am aller  
meisten glaube/ So zwinget dieser spruch (Wer da glaubt)  
vns nicht/zu wissen wer da glaube oder nicht/sondern stellet  
yederman heym ynn sein gewissen/wolle er selig werden so mu-  
sse er glauben vnd nicht heuchlen/als wolt er an der tauffe ge-  
nug haben/das er Christen sey/Denn er spricht nicht/Wer da  
weis/das er glaubt/odder wenn du weist/das ihener glaubt/  
Sondern/Wer da glaubt/wers hat der hats. Gleuben mus  
man/Aber wir sollen noch könnens nicht gewis wissen.

Weil denn vnser tauffe solche von anfang der Christenheit  
gewesen vnd gehalten ist / das man kinder taufft / Vnd nie-  
mand mit gutem gewissen grunde kan beweisen / das da kein  
glaube sey gewesen/ So solt man ia solchs nicht endern / vnd  
auff so ungewissen grund bawen/ Denn was man endern od-  
der stutzen



der sorgen wil/ so von alters her ist gebraucht / das sol vnd  
mus man bestendiglich beweisen/ das widder Gottes wort sey  
Sonst was nicht widder vns ist/ das ist für vns (spricht Chri  
stus) Gleich wie wir Klöstern vnd Messeren vnd der geistliche  
Keuscheit/ auch gestossen haben/ Aber also / das wir die hellen  
gewissen schrift angezeigt/ da widder sie sind / Denn wo wir  
dasselbige nicht gethan hetten/ so müssen wir sie warlich las  
sen stehen/ wie sie bis her sind gestanden.

Denn das sie sagen/ Die Kinder können nicht glauben / wo  
mit wollen sie das gewis machen? Wo ist da schrift/ damit sie  
solchs beweisen vnd drauff sie sich mügen gründen? Es dünckt  
sie wol/ weil die Kinder nicht reden noch vernunfft habē/ Aber  
der dünckel ist ungewis/ ia aller dinge falsch/ vnd ist auff vns  
ser dünckel nicht zu bawen.

Wir aber haben schrift/ das Kinder wol mügen vnd kön  
nen glauben / wenn sie gleich widder sprache noch vernunfft  
haben/ Als die schrift sagt/ Psalm. wie die Juden yhre sö  
ne vnd töchter den gözen opfferten / vnd vergossen also das  
unschuldige blut. Ist's unschuldig blut gewesen (wie der Text  
spricht) so sind sie freilich rein vnd heilige Kinder gewesen/ wels  
chs sie nicht on geist vnd glauben haben mügen sein. Item/ die  
unschuldigen kindlin/ so Herodes erwürgen lies/ sind auch kin  
der gewesen/ nicht ober zwey iar / freilich on sprache vnd ver  
nunfft/ noch sind sie heilig vnd selig. Vnd Christus spricht  
Matth. 18. Das hymelreich sey der kindlin. Vnd S. Johans  
nes ym mütter leibe war ein kind / ich meyne aber ia / das er  
glauben kind.

Ja sprichstu/ mit Johannes war es ein besonders/ Aber  
damit ist nicht beweisert/ das alle getauffte Kinder glauben kön  
nen. Antwort/ Zarre doch/ las dir der weile/ Ich bin noch ni  
cht da/ das ich der Kinder glauben beweise/ Sondern da/ das  
ich beweise/ wie dein widdertennens grund falsch vnd unges  
wis sey.



sey/als der nicht kan beweisen/ das kein glaube ynn kindern  
sein müge/Denn weil ynn Johanne glauben ist / on sprache  
vnd vernunft/so bestehet dein grund nicht/da du sagest/Kin  
der mügen nicht glauben. Es ist ia nicht widder die schrift/  
das ein kind glaube/wie S. Johannes exempel zeigt. Wenn es  
nu nicht widder die schrift ist / das kinder glauben / sondern  
der schrift gemes/ So mus dein grund widder die schrift sein  
das kinder nicht glauben mügen/das wolt ich auff's erst.

Wer hat dich denn nu gewis gemacht/ das die getaufften  
kinder nicht glauben/so ich hie mit beweise/das sie mügen glau  
ben? Bistu aber ungewis/ warumb bistu denn so künne / vnd  
machst die erste tauffe zu nicht/da du nicht weist noch wissen  
kanst/das sie nichts sey? Wie? wenn alle kinder bey der tauffe  
nicht allein glauben kündten / sondern auch so wol glaubten/  
als Johannes ynn mutter leibe? Denn wir können ia nicht  
leucken/das eben der selbige Christus/bey der tauffe vnd ynn  
der tauffe ist/ Ja er ist der teuffer selbs / der dort ynn mutter  
leibe zu Johanne kam / So redet er auch eben so wol bey der  
tauffe durch des priesters mund/als er dort dorch seiner mut  
ter mund redet. Weiler denn da gegenwertig/redt vnd teufft  
selbs/warumb solt nicht auch der glaube vnd geist/durch sein  
reden vnd teuffen/so wol ynn das kind komen/als er dort ynn  
Johanne kam? Ist's doch einerley redener vnd thetter dort  
vnd hie. Vnd zumor aus/weil er spricht durch Isaiam / Sein  
wort solle nicht leer widderkomen. Tu bringe du auch einen  
einigen spruch/der da beweise / das die kinder nicht glauben  
können ynn der tauffe/weil ich so viel auff bringe/das sie glau  
ben können/vnd billich zuhalten sey/das sie glauben/ wie wol  
vns vnberuust ist/wie sie glauben odder wie der glaube gethan  
sey/ Da ligt auch nicht an.

Zu dem heist er vns die kindlin zu sich bringen Matth. 19.  
herge



hertz vnd küffet sie/ vnd spricht, Das hymelreich sey yhr. Wie  
wol hie widder sich die geister gerne wolten sperren / vnd sa-  
gen/ Christus rede nicht von kindlin/ sondern von den demütig-  
gen/ Aber es klingt nicht/ weil der Text gar klerlich saget/ man  
hab yhm kindlin/ nicht die demütigen zubracht/ Vnd Christus  
nicht spricht/ Last die demütigen / sondern die kindlin zu mir  
komen/ vnd schalt die iunger nicht darumb/ das sie den demü-  
tigen / sondern den kindlin wereten / Vnd hertzet auch nicht  
noch segenet die demütigen/ sondern die kindlin/ darumb weiß  
er sagt/ Solcher ist das hymelreich. Vnd Matth. 18. Yhr engel  
sehen meus vaters angesicht/ mus auch von den selbigen kind-  
lin zu verstehen sein / Denn er auch darnach leret / wir sollen  
auch solche kindlin werden. Wo aber solche kindlin nicht heilig  
waren/ hette er vns warlich ein böse fürbilde geben / dem wir  
gleich solten werden/ Vnd solte nicht sagen / yhr müßt wie die  
kindlin werden/ sondern viel mehr/ yhr müßet anders/ denn  
die kindlin sind/ werden. Summa/ Der schwarm geist kan ym  
diesem text keine demut aus den kindern machen/ on nach sei-  
nem dänckel/ die wort stehen zu gewaltig vnd zu klar da für  
augen.

Etlich aber wollen diesen text also matten/ das der Jüden  
kinder beschnitten waren/ darumb mochten sie wol heilig sein  
vnd zu Christo bracht werde/ Aber vnser kinder sind heidē 2c  
Antwort/ Wie wenn auch meidlin vnter den kindlin gewesen  
waren/ die man zu Christo bracht/ welche ia nicht beschnitten  
waren/ Denn sie freilich allerley kindlin zu yhm bracht haben/  
Vnd weil nicht die kneblin allein daselbst sind ausgedruckt/ so  
konnen wir die meidlin nicht ausschliessen/ sondern müßens  
lassen kindlin sein/ beide meidlin vnd kneblin / Vnd das sie ni-  
cht allein vmb der beschneitung willen/ sondern auch vmb des  
willen/ das sie nu zu Christo komen aus dem alten yns newe  
Testament/ selig heißen/ wie sein wort laut/ Last die kindlin zu  
mir komen/ denn solcher ist das reich Gottes. Solcher kindlin  
C iij spricht



(spricht er) So zu mir Kommen / ist das reich gottes / Denn durchs  
brennen vnd Kommen zu Christo / werden sie so selig / das er sie  
hertzet / segenet vnd das reich gibt. Darumb las ich schwer-  
men / wer da wil / Ich halte noch / wie ich ynn der Postil auch  
geschrieben habe / das die aller sicherste tauffe / sey der Kinder  
tauffe / Denn ein alter mensch mag triegen / vnd als ein Judas  
zu Christo Kommen vnd sich teuffen lassen / Aber ein Kind kan  
nicht triegen / vnd Kompt zu Christo ynn der tauffe / wie Jo-  
hannes zu yhm kam / vnd wie die kindlin zu yhm bracht wor-  
den / das sein wort vnd werck vber sie gehe / rüre vnd mache  
sie also heilig / weil sein wort vnd werck nicht kan vmbsonst ge-  
hen / vnd gehet doch hie alleine auff's Kind / Wo es des feilen  
solte / so müste es gar feilen vnd vmbsonst sein / welches ist vn-  
möglich.

So kan man das auch nicht leucken / das es meidlin sind ge-  
west vnd vnbeschnitten / da Psalm. 77. von sagt / das sie yhre  
töchter opfferten den gözen Canaā / vñ heist sie doch vnschul-  
dig blut. So hat warlich Mose Leuit. 12. auch die meidlin be-  
folhen Gotte zu opffern / reinigē vnd lösen / Vnd ist wol schein  
das die kneblin haben die beschneitung alleine erlitten / aber  
die meidlin dennoch der selbigen auch mit genossen / yn Krafft  
des spruchs / so Gott sagt zu Abraham Gen. 17. Ich wil deines  
samens Gott sein / vnd die beschneitung sol ein bund sein zwis-  
schen mir vnd dir / vnd deinem samem nach dir. Vñ sind war-  
lich die meidlin auch Abrahams samem / vnd Gott ist durch sol-  
chen spruch eben so wol yhr Gott / ob sie gleich nicht beschnit-  
ten sind / als der kneblin.

Gleuben sie nu / das Gott durch die beschneitung bund /  
beide kneblin vnd meidlin annimpt vnd yhr Gott ist / War-  
umb solt er denn auch nicht vnser Kinder / durch der Tauffen  
bund annemen / so er sich auch vns verheissen hat / das er wil /  
nicht allein der Juden / sondern auch der Heiden Gott sein /  
Rom.



Roma. 3. sonderlich der Christen vnd glaubigen/ Hilfft dort die beschneitung der kneblin/ beide kneblin vnd meidlin/ das sie Gottes volck werden/ vmb Abrahams glauben willen/ von dem sie komen/ wie viel mehr sol hie die tauffe/ eins iglichens besonders helffen/ das sie Gottes volck werden/ vmb Christus verdienst willen/ zu dem sie bracht/ vnd von yhm gesegnet werden. Das sage ich alles/ das der widderteuffer grund vngewis ist/ vnd sie gar frenelich drauff bawen.

Ja sprichstu/ Er hat die Kinder nicht heissen teuffen/ so find man des kein Exempel ynn der Apostel schrifften odder Episteln. Antwort/ Er hat auch keine alten/ noch man noch weib/ noch yemand ynn sonderheit heissen tauffen/ so wollen wir niemand teuffen. Er hat aber heissen alle Heiden teuffen/ keinen ausgeschlossen/ da er sagt/ Gehet hin/ leret alle Heiden vnd teuffet sie ynn meinem namen 2c. Matth. vlti. Tu sind die Kinder auch ein gros stücke der Heiden/ So lesen wir ynn der Apostel geschicht vnd S. Paulus Episteln/ wie sie ganze heuser getaufft haben/ Aber die Kinder sind warlich auch der heuser ein gut stücke/ Das es scheint/ gleich wie yhn Christus on alle vnterscheid befiehlt/ alle Heiden zu leren vnd teuffen/ Also haben sie auch gethan vnd ynn den heusern alles getaufft/ was drinnen gewesen ist/ Haben sich nicht versehen/ das die Rotten geister würden vnterscheid suchen zwischen iung vnd alt/ Weil sie sonst ynn allen Episteln so viel schreiben/ das kein ansehen noch vnterscheid der person vnter den Christen sind/ sie hetten sonst solchs alles vberkomen vnd ausgedruckt/ Denn S. Johannes. 1. Johā. 2. auch den kindlin schreibt/ das sie den vater kennen. Vnd freilich die Kinder tauffe von den Apost. kome ist/ wie S. Aug. auch schreibt/ Derhalben die teuffler aller ding ferlich handeln/ das sie nicht allein yhres dingens vngewis sind/ sondern auch wider solche eingefurte sprüche handeln/ vnd vnterscheid der person ertichten aus eignem kopff/ da sie Gott nicht gemacht

*1. Cor. ca. 1*



macht hat/Denn ob sie gleich vermeineten/das sie nicht gnug  
sam dadurch überwunden würden/so müssen sie dennoch/wie  
zencklich sie sind/sich zum wenigsten dafür entsetzen/vnd eine  
sorge kriegen / das sie vnrecht thun / vnd ungewisse gründe  
sich widderteuffen/Wenn sie aber ungewis sind/ so ist schon  
beschlossen/das sie vnrecht thun/Denn ynn Götlichen sachen  
sol man nicht des ungewissen/sondern des gewissen spielen.

Denn so ein widdertauffer höret/(der nicht halstarrig/  
sondern gelerig sein wil) das/gleich wie Johannes ist gelerig  
vnd heilig worden/da Christus kam vnd durch seiner mutter  
mund redet/also werde das kind auch gleubig/wenn Christus  
ynn der tauff zu yhm/durchs teuffers mund redet/weil es sein  
wort/sein gepot ist/Vnd sein wort nicht kan umb sonst gehen.  
So mus dennoch der widderteuffer sagen/Es mocht warlich  
sein/vnd kans nicht ganz vnd bestendiglichen leucken / noch  
schriffte dawidder auffbringen. Kan ers aber nicht bestendig  
lich vnd mit gutem grunde leucken/so kan er auch seine wida  
dertauffe nicht bestendiglich erhalten/Denn er mus zuvor be  
stendiglich beweisen/das die kinder on glaupe getaufft wer  
den/sol er das widdertauffen betreffigen. Also meyne ich/sey  
gnug beweiset/das yhr grund ungewis vnd lauter vermessen  
heit sey.

Wolan/ich setze gleich/das sie aller dinge künden gewis  
machen/das die kinder on glauben sind ynn der tauffe/wolt  
ich doch gerne wissen/aus was grund sie wolten beweisen/das  
sie umb des willen widder zu teuffen sein solten/wenn sie her  
nach gleubig odder bekennend des glaubens werden? Denn es  
ist nicht gnug/das sie sagen / Sie sind on glauben getaufft/  
drumb sind sie widder zu teuffen. Sie müssen ursachen geben/  
Es ist ein vnrechte tauffe sprichstu. Was ligt daran/dennoch  
ists eine tauffe/Ja es ist eine rechte tauffe an yhr selbs/on das  
sie vnrecht empfangen/Denn es sind die wort gesprochen vnd  
alles



gethan/was zur tauffe gehöret/ so vöellig/ als geschicht/ wenn  
der glaube da were. Wenn nu ein ding an yhm selbs recht ist/  
so mus darumb nicht anders vernewet werden/ obs gleich vn-  
recht empfangen ist/ Man thu das vnrecht ab / so wirts alles  
recht/ on alle vernewerung / Abusus non tollit substantiam/  
imo confirmat substantiam. Misbranch endert keinem ding  
sein wesen/ia on wesen kan kein misbranch sein.

Wenn nu der glaube vber zehen iar nach der tauffe keme/  
warumb solt man doch widderumb teuffen/ so nu der tauffe al-  
ler ding ist gung geschehen/ vnd alles recht worden? Denn er  
glaubt nu/ wie die tauffe foddert. Ist doch der glaube nicht  
vmb der tauffe willen/ sondern die tauffe vmb's glaubens wil-  
len. Wenn nu der glaube kompt/ so hat die tauffe das yhr/ vnd  
ist die widdertauffe vergeblich.

Gleich als wenn eine magd einen man neme/ mit vnwillen  
vnd ganz on ehlichs hertz gegen dem man/ Die ist freilich fur  
Gott nicht sein ehlichs weib. Nu vber zwey iar gewönne sie  
yhn ehlich lieb/ solte man hie auch widderumb new verlöbnis/  
new vertrawung vnd new hochzeit anrichten/ vnd fur geben  
sie were on ehliche trew sein weib worden / darumb were die  
vorige verlöbnis vnd hochzeit nichts? Man wurde freilich sa-  
gen/ du werest ein narre/ Sintemal es hie nu alles schlecht we-  
re/ weil sie zu recht keme/ vnd den man/ den sie vnrecht geno-  
men hatte/ nu recht behelt. Item/ wenn nu ein allt mensch sich  
felschlich teuffen liesse/ vnd vber ein iar glaubig würde / lieber  
meinstu/ das man solchen auch widderumb teuffen solte? Er  
hat die rechte tauffe vnrecht empfangen / So höre ich wol/  
sein vnrecht solt die tauffe vnrecht machen/ vnd solte menschi-  
cher misbranch vnd bosheit stercker sein / denn Gottes güte  
vnd vnzerstörliche ordnung? Gott macht einen bund mit dem  
volck Israel auff dem berge Sinai/ Da haben etliche den selb-  
D bigen



bigen bund nicht recht vnd on glauben angenommen. Wenn nu hernach die selbigen zum glauben komen sind / lieber solt der bund darumb auch vnrecht sein gewesen / vnd Gott musste eyn yglichen von newen auff den berg Sinai komen vnd den bund widder vernewen?

Item / Gott lest seine zehen gebot predigen / Aber weil die selbigen etliche allein mit den ohren fassen / aller ding vnrecht / so sind es nicht zehen gebot / tügen auch nichts / Vnd Gott musste hinfurt andere newe zehen gebot geben / an stat der vorigen / vnd musste nicht gnug sein / das die leute recht sich bekerten / vnd die vorigen zehen gebot hielten. Da würde mir ein seltsam wesen aus / das Gottes wort / so ewiglich bleibt / musste so oft verwandelt vnd ein neues werden / so oft die menschen sich wandeln vnd new werden / So es doch darumb bestendig vnd einig bleibt / auff das die / so yzt nicht dran hangen odder dauon fallen / einen gewissen bestendigen fels haben widder zu keren vnd sich dran zu halten. Wenn vntersassen yhrem herrn huldeten / der meinung / sie wolten yhn tödten / vnd vber drey tage rewete sie es vnd geben sich recht ynn gehorsam von herten / Lieber / were es hie auch not / auff's newe vnd anders hulden? Nein zwar / weil sie nu die hulde recht füren / die sie doch felschlich gethan hatten.

Wenn sie da hinaus wollen / so werden wir zu teuffen gnug kriegen alle stunde / Denn ich wil den spruch (Wer da gleubt) für mich nemen / vnd wo ich einen Christen finde / der gefallen odder an glauben ist / da wil ich sagen / Dieser ist on glauben / darumb mus seine tauffe nichts sein / vnd wil yhn widderteuffen / Fellet er darnach abermal / so wil ich abermal sagen / Siehe / der ist on glauben / darumb ist seine vorige tauffe nichts / Er mus zum dritten mal auch getaufft werden / Vnd so fort an / so oft er fellet odder zweuel ist / ob er gleube / wil ich sagen / Der gleubt nicht / darumb ist seine tauffe nichts / Es mus kurz  
vmb



Umb sich so lange lassen teuffen/bis er nymer mehr fallen od-  
der on glauben sein könne / auff das er den spruch (Wer da  
glaubt) gung thue. Sage mir / welcher Christ wil denn ymer  
mehr gungsam getaufft werden/odder seiner tauffe ein ge-  
wis ende bekommen? Kan nu die tauffe recht vnd gung bleiben/  
ob der Christ tausent mal ein iar vom glauben siele/ odder sun-  
digete/ Vnd ist gung/das er selbs widder sich widder zu recht  
kere/vnd gäubig werde/vnd nicht mus so offt wider getaufft  
werden/Warumb solt nicht auch die erste tauff gung vnd re-  
cht sein/wenn der Christ hernach recht vnd gäubig wird? So  
doch kein vnterscheid ist vnter der tauffe on glauben / sie sey  
fur odder hernach on glaube/ so ist sie on glaube / Ist sie on  
glaube/so mus man sie endern nach dem spruch (Wer da glau-  
bt) wie die widderteuffer narren.

Das sage ich darumb/wenn die teuffer gleich yhr ding  
kündten beweisen/das kinder on glauben sind / (als sie nicht  
können) so hetten sie doch damit nichts mehr erstritten/denn  
das die rechte tauffe/so von Gott eingesetzt ist / nicht recht/  
sondern ym misbrauch empfangen ist. Wer aber nicht mehr  
denn misbrauch beweiset/der beweiset auch nicht mehr / denn  
das der misbrauch zu endern sey/vnd nicht des dinges wesen/  
Den misbrauch endert keins dinges wesen. Golt wird darumb  
nicht stro/obs ein dieb stelet vnd misbraucht. Silber wird dar-  
umb nicht papyr/ obs ein wucherer felschlich gewinnet. Weil  
den die widderteuffer allein den misbrauch der tauffe anzeigen  
so handeln sie widder Gott/natur vnd vernunft/das sie auch  
die tauffe sampt dem misbrauch newē vnd endern/gleich wie  
alle ketzler auch am Euangelio thun/weil sie das selbige felsch-  
lich vernemen/vnd also ym misbrauch hören/faren sie zu/vnd  
enderns/vnd machen ein new Euangelion draus. Also/wo du  
die widderteuffer hin kere/so thun sie vnrecht / lestern vnd  
schenden Gottes ordnung/heissen es vnrechte tauffe/vmb der  
D ij menschen



menschen vnrecht odder misbrauchs willen/ wie wol sie auch solch vnrecht vnd misbrauch der menschen nicht können beweisen.

Es ist aber ein werck teuffel bey yhn/ der gibt glauben fur/ vnd meinet doch das werck / vnd füret mit dem namen vnd schein des glaubens die arme leute / auff trawen der werck / Gleich wie vnter dem Papstum vns geschehen ist / da man vns zum Sacrament treib/ als zum werck des gehorsams/ vnd niemand dahin gieng/ das er den glauben speisen wolte / sondern wenn wir das Sacrament empfangen hatten/ so war es alles geschehen vnd das werck volbracht. Also hie auch treiben diese widderteuffer auff das werck / das die leute drauff trawen/ wenn sie also getaufft werden/ so sey es recht vnd wol gethan/ Nach dem glauben fragen sie ynn der warheit nichts on das sie yhn rhümen allein zum schein/ Denn wie droben gesagt/ wo sie solten des glaubens gewis sein / mussten sie nymer mehr keinen menschen teuffen/ Vnd wo sie nicht auff's werck traweten/ odder den glauben mit ernst suchten / dürfften sie sich nicht widder teuffen/ Sintemal ynn der ersten tauffe/ das selbige wort Gottes ein mal gesprochen/ noch ymer bleibt vnd stehet/ das sie dran können hernach glauben/ wenn sie wollen/ vnd das wasser auch vber sie gegossen/ das sie es auch hernach ym glauben fassen mügen/ wenn sie wollen/ Denn ob sie gleich hundert mal die wort widdersprechen / so sind es doch die selbigen wort/ so ynn der ersten tauffe gesprochen sind / Vnd nicht yhre krafft daher haben / das sie viel mal odder auff's newe gesprochen werden/ sondern das sie befolhen sind zu sprechen ein mal.

Denn das ist des teuffels rechtes meister stück eines/ das er die Christen von der gerechtikeit des glaubens / auff die gerechtikeit der werck nöttiget/ wie er die Galater vnd Corinthier/ welche (als Sant Paulus schreibt) so gar fein glaubten  
vnd



vnd recht lieffen ynn Christo / auch also auff die werck treib /  
Also yzt / da er sahe / das die Deudschen durchs Euangelion /  
Christum fein erkandten vnd recht glaubten / dadurch sie den  
auch gerecht fur Gott waren / feret er zu / vnd reisset sie von  
solcher gerechtikeit / als sey sie nichts / vnd furet sie ynn das  
widderteuffen / als ynn eine bessere gerechtikeit / Macht das  
mit / das sie die vorigen gerechtikeit verleucken / als die vn-  
tichtige / vnd auff eine falsche gerechtikeit fallen. Was solich  
sagen? Wir Deudschen sind rechte Galater vnd bleiben Galat-  
ter / Denn wer sich widderteuffen lest / der widderrufft mit der  
that / seinen vorigen glauben vnd gerechtikeit / vnd macht sie  
zu sunden vnd verdamlich / welchs ist greulich / aller ding / wie  
Sant Paulus sagt / das die Galater von Christo abe sind / ia  
Christum zum sunden diener machten / wo sie sich beschneiden.

Es thut aber der Satan solchs alles / vmb vnser willen /  
auff das er vnser lere verdecktig mache / als die wir nicht re-  
chtschaffen geist noch lere haben mügen / weil wir nicht recht  
getaufft sind. Aber an den fruchten kan man den bawm kenz-  
nen / Denn wir noch nicht / widder ym Bapstum noch ynn als  
len rotten / sehen solche menner / die so gewaltiglich die schrift  
handlen vnd auslegen / als auff vnser seiten sind / von Gottes  
gnaden / welches nicht der geringsten gaben des geistes eine  
ist. 1. Corin. 12. So sehen wir wol bey yhn rechte fruchte des teu-  
ffels / Nemlich / das etliche vmb der widdertauffe willen / von  
weib vnd kind / von haus vnd hoff lauffen / keine oberkeit ha-  
ben wollen / vnd so fort an / So doch S. Paulus leret / wer die  
seinen nicht versorget / hat den glauben verleucktet / vnd ist er-  
ger denn ein Zeide. 1. Timo. 6. Vnd zum. 1. Corin. 7. wil er auch  
nicht / das ein gleybig gemalh / sich vom vngleybigen scheidet.  
Vnd Christus auch die ehe vngescheiden haben wil / on wo hu-  
rerey ursach gibt. Vnser geist lest / ia er heist allerley stende  
bleiben vnd yn ehren halten / vnd ym friede den glauben durch  
Dij die liebe



die liebe vben / daraus kein auffrühr noch billiche klage vber  
vnsere lere komen kan / wie wol die Papisten mit yhrem liegen  
alles vnglück vnd schuld geben / Aber das hat seinen richter /  
auch yhr eigen gewissen hie vnd dort.

Hie mit ist auch verlegt / das sie daneben fürgeben / Die tau-  
ffe sey nichts / weil der priester odder teuffer nicht geglaubt ha-  
be / Denn ob gleich Sant Peter yemand teuffet / dennoch köns  
de niemand wissen / ob Sant Peter zu der selbigen stunde gleub-  
bet odder zweimelt / Denn es kan niemand sein herze sehen.  
Summa / Solch stück hat vorzeiten die Donatisten auch bewe-  
get / das sie sich absonderten vnd widder teufften / da sie sahen  
wie etliche prediger vnd teuffer vnheilig waren / Vnd fiengen  
an / die tauffe zu grunden auff menschen heilicheit / Welche doch  
Christus auff sein wort vnd gebot gründet. Ja es sicht aus-  
ch vnser schwermer an / die Sacraments feinde / Denn wie wol  
sie fürgeben / die warheit vnd schrift zwingt sie / so liegen sie  
doch / Sondern das stößt sie (wie sie denn auch an etlichen ort-  
ten heraus faren) ob ein yglicher bube müge Christum yns  
brod bringen / gerade als were die ganze welt gewis vnd sicher  
da sie selbs gläubig vnd eitel heilthum / vnd nicht / ia so grosse  
buben weren für Gott / als die sind / die so freuel richten vnd  
buben schelten / vnd vergessen des balcken ynn yhem auge.

Wir haltens aber dafür / das / so S. Johannes sich nicht

schemet von Caiphas Gottes wort zu hören / vnd rühmets da-  
zu für eine weissagung / Vnd so Moses sampt dem volck Isra-  
el des gottlosen Bileams weissagung annemen vnd für Got-  
tes wort halten. Item Sant Paulus die heidenische Poeten /  
Araton vnd Epimeniden annimpt / vnd yhre sprüche (als got-  
tes wort) preiset. Vnd Christus die gottlosen Phariseer auff  
Moses stuel wil gehört haben / als die gottlosen lerer / So sol-  
len wir vns viel weniger etel machen / sondern Gott richten  
lassen



lassen yhr böses leben/ vnd vns yhr Göttlich wort dennoch ge  
fallen lassen/Denn sind sie böse/so sind sie yhn selbs böse/Leren  
sie aber recht/so leren sie vns recht. Also thetten die frumen  
Magi auch Matth.2. Sie höreten Gottes wort aus der  
schriffte Michee/durch den mund Herodis des grewlichen Kö  
niges/ Welcher es forder aus den gottlosen hohen priestern  
vnd schrifftegelerten höret. Noch zogen sie auff solch wort hin  
gen Bethlehem/ vnd funden Christū/ Vnd hindert sie nichts  
vberal/das sie Gottes wort nicht/denn allein durch Heroden  
den mörder Christi höreten.

Müssen wir doch bekennen / das die schwermer die schriffte  
vnd Gottes wort haben yn andern artickeln/Vnd wer es von  
yhn höret vnd gleubt/ der wird selig/wie wol sie vnheilig/ke  
zer vnd lesterer Christi sind. Es ist nicht ein geringe gnade/  
das Gott sein wort auch durch böse buben vnd gottlosen gibt/  
Ja es ist etlicher massen ferlicher/wenn ers durch heilige leute  
gibt/denn so ers durch vnheilige gibt/ Darumb das die vnuer  
stendigen drauff fallen/ vnd hangen mehr an der menschen  
heiligkeit/den am wort gottes/Dadurch geschicht den grösser  
ehre den menschen/denn Gott vnd seinem wort/welche fahr  
nicht ist/wo Judas/Caiphaz vnd Herodes predigen/wie wol  
damit niemand entschuldigt ist yn seinem bösen leben/ob Gott  
desselbigen wol brauchen kan. Kan nu ein gottloser das recht  
Gottes wort haben vnd leren/so kan er auch viel mehr recht  
teuffen vnd Sacrament geben/ Sintemal es grösser ist/Gottes  
wort leren/denn teuffen/wie Sant Paulus rhümet.1. Cor.  
1. Vnd wie gesagt ist/Wer nicht ehe wil von der tauffe halten  
er wisse denn/das der teuffer gleube/der mus nymer mehr von  
keiner tauffe halten/Den so ich frage/Bistu widder getaufft?  
Ja. Wie weistu/das du nu recht getaufft bist? Wiltu hie ant  
worten/das dein teuffer sey gleubig gewesen? So frage ich/wie  
weistu es? Hastu sein hertz gesehen? So stehestu denn/wie but  
ter an der Sonnen. So ist



So ist nu vnser tauffen grund der aller sterckest vnd sicherst  
Das Gott hat einen bund gemacht mit aller welt / zu sein der  
Heiden Gott ynn aller welt / wie das Euangelion sagt / Das  
Christus hat befolhen ynn alle welt das Euangelion zu predi  
gen / als auch die Propheten manchfeltiglich haben verkündi  
get. Vnd zum zeichen dieses bundes / hat er die tauffe einge  
setzt / gepoten vnd befolhen vnter alle Heiden / wie Matthei  
vlt. stehet / Gehet hin ynn alle welt / vnd leret alle Heiden / vnd  
teuffet sie ym namen des Vaters zc. Gleich wie er mit Abra  
ham vnd seinem samen einen bund machet / yhr Gott zu sein /  
vnd zum zeichen des bundes die beschneitung gab. Hie stehet  
vnser gewisser grund vnd feste / Nemlich / das wir vns teuffen  
lassen / nicht darumb / das ich des glaubens gewis sey / Sondern  
das Gott geboten hat vnd haben wil. Denn ob ich gleich kei  
nes glaubens nymer mehr gewis würde / so bin ich dennoch  
des gepots gewis / da Gott die tauffe gebeut / weil ers offent  
lich hat lassen ausgehen fur aller welt. Hie kan ich nicht fei  
len / Denn Gottes gebot kan nicht triegen / Er hat aber nie  
mand von meinem glauben etwas gesagt / gepoten noch be  
folhen.

War ist's / das man glauben sol zur tauffe / Aber auff den  
glauben sol man sich nicht teuffen lassen. Es ist gar vielen ein  
ander ding / den glauben haben / vnd sich auff den glauben ver  
lassen / vnd also sich drauff teuffen lassen. Wer sich auff den  
glauben teuffen lest / der ist nicht allein vngewis / sondern auch  
ein abgöttischer verlenckter Christ / Den er trawet vnd bawet  
auff das seine / nemlich auff eine gabe / die yhm Got geben hat  
vnd nicht auff Gotes wort alleine / gleich wie ein ander bawet  
vnd trawet auff seine stercke / reichum / gewalt / weisheit / hei  
lickeit / welchs doch auch gabe sind von got yhm gebē. Welcher  
aber getaufft wird auff Gottes wort vnd gebot / wenn da glei  
ch kein glaube were / dennoch were die tauffe recht vnd gewis /  
denn sie geschicht / wie sie Gott geboten hat / Nütze ist sie wol  
nicht



nicht dem vngleubigen teufflinge / vmb seines vnglaubens  
willen / Aber drum ist sie nicht vnrecht / vngewis oder nichts /  
Wenn das alles solt vnrecht odder nichts sein / was den vngleubigen nicht nütze ist / so würde nichts recht noch gut bleiben / Denn das Euangelion ist auch aller welt zu predigen geboten / der vngleubige hörets vnd ist yhm nichts nütze / solts aber darumb auch nicht ein Euangelion odder vnrecht Euangelion sein / Gott selbs ist dem gottlosen kein nütze / solt er darumb nicht Gott sein.

Wenn nu gleich ein alter mensch solt getaufft werden / vnd spreche / Herr ich wil mich teuffen lassen. So fragestu / Gleubstu denn auch? wie Philippus den Kemerer Acto. vnd wir teglich die teufflinge fragen / So wird er mir nicht so her faren vnd sagen / Ja / ich wil wol berge versetzen durch meinen glauben / Sondern also / Ja herr ich gleube / aber auff solchen glauben habe ich nicht / Er mocht mir zu schwach odder vngewis sein / Ich wil getaufft sein auff Gottes gebot / der es haben wil von mir / Auff solch gebot wage ichs / mit der zeit mag mein glaube werden / wie er kan / Wenn ich auff sein gepot getaufft bin / so weis ich / das ich getaufft bin / Wenn ich auff meinen glauben getaufft würde / solt ich morgen wol vngetaufft funden werden / wenn mir der glaube entsiele / odder ich angefochten wurde / als hette ich gestern nicht recht gegleubt. Mir nicht / Er fechte Gott vnd sein gebot an / darauff ich getaufft bin / das ist mir gewis gnug / Mein glaube vnd ich stehen vnser ebentheur / Gleube ich / so ist mir die tauffe nütze / gleube ich nicht / so ist sie mir nicht nütze / Aber die tauffe ist darumb nicht vnrecht odder vngewis / stehet nicht auff euenturo / das ist / auff ebentheur / sondern dem gewissen Gottes wort vnd gebot.

Also wird er auch sagen von seiner kinder tauffe / Ich dancke Got vnd bin frölich / das ich ein kind getaufft bin / denn da  
L habe



habe ich gethan/was Got geboten hat/ Ich habe nu geglaubt  
odder nicht / so bin ich dennoch auff Gottes gebot getaufft/  
die tauffe ist recht vnd gewis/ Gott gebe/ mein glaube sey no  
ch heutiges tages gewis odder vngewis/ Ich mag denckē/ das  
ich noch glaube vnd gewis werde/ An der tauffe feilet nichts/  
am glauben feilets ymer dar/ Denn wir haben an dem glauben  
gnug zu lernen vnser leben lang/ Vnd er kan fallen / das man  
sagt/ Sihe/ da ist glaube gewesen/ vnd ist nicht mehr da/ Aber  
von der tauffe kan man nicht sagen/ Sihe/ da ist tauffe gewes  
sen/ vnd ist nu nicht mehr tauffe. Nein/ sie stehet noch/ denn  
Gottes gebot stehet noch/ vnd was nach seinem gebot gethan  
ist/ stehet auch vnd wird auch bleiben.

Bisher haben wir/ meins dünkens / starck gnug beweiset/  
das die widderteuffer vnrecht thun / das sie die erste tauffe  
vernichtigen/ wenn sie gleich gewis weren / das die kinder on  
glauben getaufft worden/ des sie doch auch nicht gewis sein  
können/ Widderumb/ das die kinder glauben/ das können wir  
auch mit keinem spruch beweisen/ der so hell vnd klar eraus sa  
ge mit solchen odder der gleichen worten/ Ihr solt die kinder  
teuffen/ denn sie glauben auch. Wer vns auff solche buchstabē  
zu beweisen dringet/ dem müssen wir auch weichen vnd ge  
wonnen geben/ Wir finden sie nirgent beschrieben. Aber frus  
me vernunfftige Christen begeren solchs nicht/ Die zenckische  
halstarrige Rotten thuns / auff das sie klug gesehen werden.  
Widderumb werden sie auch keinen buchstaben bringen / der  
da sage/ Ihr solt alte leute teuffen vnd kein kind. Doch das kin  
der teuffen recht sey/ vnd sie auch glauben / bereden wir vns  
aus vielen starcken vrsachen.

Erstlich/ weil solch kinder teuffen von den Aposteln her  
kompt/ vnd sind der Apostel zeiten geweret hat/ so könnē wirs  
nicht weren/ müßens so lassen bleiben / weil niemand bisher  
hat mügen beweisen/ das die kinder ynn der tauffe nicht glau  
ben/ odder



ben odder solch teuffen vnrecht sey/ Denn ob ich gleich vngewis were/ das sie gleubten/ so musste ich doch meines gewissens halben sie teuffen lassen / Sintemal es viel besser ist / das die tauffe vber die kinder gehe/ denn das ich sie abthet/ Denn wo die tauffe recht vnd nütze were vñ seligete die kinder (wie wir gleuben) vnd ich thet sie abe/ so were ich schuldig an allen kindern/ so on tauffe verloren würden/ das were grausam vnd erschrecklich/ Were sie aber vnrecht/ das ist/ vnnütze/ vnd hülfte die kinder nichts/ so were damit nichts anders gesündigt/ denn das Gottes wort were vergeblich gesprochen vnd sein zeichen vergeblich gegeben/ Ich were aber damit keiner verloren seelen schuldig / sondern des vergeblichen branchs an Gottes wort vnd zeichen.

Aber solchs wurde mir Gott leichtlich vergeben/ weil ichs vnwissen thet/ vnd dazu aus furcht thun musste / als der ichs nicht ertichtet/ sondern also von anfang auff mich komen were vnd mit keiner schrift beweisen künd/ das vnrecht sey / vnd vngerne thet/ wo ichs vberweiset wurde/ Vnd were zwar schier gleich/ als wenn ich Gottes wort / das ich auch aus seinem befelch mus predigen/ vnter die vngleubigen vergeblich predigete/ odder wie er sagt/ die perlen für die sew/ vnd das heiligtum für die hunde würffe/ Was kundte ich dazu? Wie wolt ich auch lieber daher sundigen/ das ich vergeblich predigete/ denn dort hin / das ich gar nichts wolt predigen/ denn mit vergeblicher predigt/ werde ich keiner seelen schuldig / Aber mit nicht predigen/ mochte ich vieler seelen schuldig werden/ Ja es were allzu viel an einer. Dis sage ich / wenns gleich so were/ das der kinder glaube vngewis were / auff das man die gewissen tauffe vmb vngewissens glaubens willen nicht nachlasse/ weil wirs nicht erfunden/ sondern also von der Apostel zeit her empfangen haben/ Denn man soll nichts vmbstossen odder endern/ was man nicht mit heller schrift kan vmbstossen odder endern.

GOTT ist wunder/

Lij

lich ynn



lich ynn seinen wercken/ Was er nicht haben wil/ da zeuget er  
gnugsam von yn der schrift/ was er daselbs nicht zeuget/ das  
las man gehē/ als sein werck/ wir sind entschuldiget/ Er wird  
vns nicht verfuren/ Das were wol ein böse stücke/ wenn wirs  
wusten odder gleubten/ das der kinder tauffe vntüchtig were/  
vnd teufften sie gleich wol/ wie die Valdenser thun/ Denn das  
mit spottet man Gott vnd sein wort.

Zuffs ander/ ist das ein gros anzeigen/ Es ist noch nie kei-  
ne ketzerey endlich bestanden/ sondern alle zeit auch ynn kurtz/  
sagt Sant Petrus / an tag komen vnd zu schanden worden/  
wie Sant Paulus James vnd James einfüret/ vnd yhr glei-  
chen/ das yhr torheit endlich yderman offenbar ist wordē 2c.  
Were nu der kinder tauffe nicht recht / furwar Gott hette es  
so lange nicht lassen hin gehen/ auch nicht so gemein ynn aller  
Christenheit durch vnd durch lassen halten / Sie hette auch  
endlich müssen ein mal zu schanden werden für yederman/  
Denn das yzt die widderteuffer sie schenden / ist noch vnaus-  
gefurt/ vnd heist noch nicht zu schanden worden / Gleich wie  
nu Gott erhalten hat/ das die Christen ynn aller welt die Bi-  
blia/ für Biblia/ das Vater vnser/ für Vater vnser/ den kinder  
glauben/ für glauben/ halten/ Also hat er auch der kinder tau-  
ffe erhalten vnd nicht lassen vntergehen / vnd doch daneben  
alle ketzerey sind vntergangen/ die viel länger vnd newer sind  
gewest/ denn der kinder tauffe. Solch wunderwerck Gottes  
zeiget an/ das die kinder tauffe mus recht sein/ Denn solchs  
hat er am Papstum nicht geübt / welchs dazu auch ein new  
ding ist/ aber noch nie bey allen Christen ynn aller welt also  
angenomen/ wie der kinder tauffe/ Biblia/ glauben/ Vater vn-  
ser 2c.

Sprichstu Solchs schlenst noch nichts/ das der kinder tau-  
ffe gewis sey / Denn es ist kein spruch aus der schrift. Ant-  
wort/ Das ist war/ es schlenst nicht starck genug mit sprüchen/  
das du



das du kinder tauffe drauff mochtest anfahen bey den ersten  
Christen nach den Aposteln / Aber es schleust gleich wol so  
viel / das ytz bey vnser zeit niemand mit gutem gewissen thar  
der kinder tauffe / so lange her bracht / verwerffen odder lassen  
fallen / weil sie Gott mit der that nicht allein duldet / sondern  
auch handhabt / von anfang / das sie noch nie ist vntergangē /  
Denn wo man Gottes werck sibet / mus man eben so wol wei-  
chen vnd glauben / als wo man sein wort höret / Es sey denn /  
das offentliche schrift solch werck vns anzeige zu meiden / Als  
das Bapstum liesse ich auch warlich gehen vnd stehen / als ein  
Gottes werck / Aber weil die schrift dawidder ist / halt ichs  
wol fur ein werck Gottes / aber nicht fur ein werck der gnas-  
den / sondern des zorns das zu fliehen ist / Als alle andere plas-  
gen auch Gottes werck sind / aber ym zorn vnd vngnaden.

Auffs dritte / ist des gleichen Gottes werck / das Gott alle  
zeit vielen / so kinder getaufft sind / gegeben hat grosse heilige  
gaben / sie erleucht vnd gesterckt mit dem heiligen geist vnd  
verstand der schrift / vnd grosse ding durch sie gethan ym der  
Christenheit / als Johanni Zus vnd seinen gesellen zu der zeit  
vnd vor yhm vielen andern heiligen / Wie er izt auch thut fast  
vielen feinen leuten / Vnd treibt doch der keinen zumor zu der  
widdertauffe / wilchs er on zweifel thun würde / wo ers dafur  
hielte / das sein gebot von der tauffe nicht recht gehalten were  
Denn er thut nichts widder sich selbs / so bestettiget er auch  
nicht mit seinen gaben den vngheorsam seines gebots. Weil er  
denn solche gaben gibt / die wir bekennen müssen / das es Got-  
tes heilige gaben sind / so bestettiget er freilich damit die erste  
tauffe vnd helt vns fur recht getaufft. Also beweisen wir mit  
diesem werck / das die erste tauffe recht / vnd die widdertauffe  
vnrecht sey / gleich wie Sant Petrus vnd Paulus Act. 15. auch  
aus dem wunder / da Gott den Heiden den heiligen geist gab /  
beweiseten diesen Gottes willen / das die Heiden nicht mussten  
Moses gesetz halten.

¶ iij      Auffe



Auffs vierde/Wo die erste odder kinder tauffe nicht recht  
were/so wurde folgen/das lenger denn ynn tausent iaren/kei-  
ne tauffe vnd keine Christenheit gewesen were/welchs ist vn-  
möglich / Denn damit würde der articel des glaubens falsch  
sein / Ich glaube eine heilige Christliche kirche. Denn vber tau-  
sent iar fast eitel kinder tauffe gewesen ist / Ist die tauffe nu vn-  
recht/so ist die Christenheit so lange zeit on tauffe gewesen / Ist  
sie on tauffe gewesen/so ist sie nicht Christenheit gewesen / Denn  
die Christenheit ist Christus braud / yhm vnterthan vnd ges-  
horsam/hat seinen geist/sein wort/seine tauffe/sein sacrament  
vnd alles was Christus hat / Vnd zwar wenn die kinder tauffe  
nicht gemein ynn aller welt / sondern bey etlichen were anges-  
nomen / (wie das Bapstum) so mochten die widderteuffer ei-  
nen schein haben / vnd die selbigen annemer straffen / gleich  
wie wir straffen die geistlichen / das sie das Sacrament zum  
opffer gemacht haben/welchs bey den leihen doch ein Sacra-  
ment ist blieben. Aber weil ynn aller welt durch die ganze  
Christenheit die kinder tauffe gangen ist bis auff diesen tag/  
ist kein schein nicht da/das sie vnrecht sey / Sondern ein starck  
anzeigung/das sie recht sey.

Auffs funffte / Hie zu stimmt nu auch diese schrifft / da S.  
Paulus vom Endechrist saget. 2. Thessaloni. 2. Das er sitzen  
solle ynn Gottes tempel / dauon wir droben weiter gehöret ha-  
ben. Ists Gottes tempel / so ist es nicht eine ketzer gruben / son-  
dern die rechte Christenheit / Welche mus fur war die rechte  
tauffe haben / da mus kein zweuel an sein. Ansehen vnd hö-  
ren wir ia keine ander / denn kinder tauffe / beide vnter dem  
Bapst / Türcken vnd ynn aller welt. Item / das Christus heist  
die kindlin zu yhm komen vnd brengen Matth. 19. vnd spricht  
das reich Gottes sey yhr. Item / das die Apostel ganze huser  
getaufft haben. Item / das Johannes den kindlin schreibt.  
Item / das S. Johannes ynn mutter leibe gleybig ward / wie  
solchs



solchs droben gesagt ist. Ob etlich dieser sprüche den schwermern nicht gnugthun/da ligt mir nicht an/Mir ist gnug/das sie dennoch yederman das maul stopffen/das sie nicht können sagen/Die kinder tauffe sey nicht/Sie sey bey yhn gleich vngewis/so habe ich gnug/das sie müssen die selbigen hinfort nicht so zu nicht machen/sondern ym zweiucl vnter sich bleiben lassen/Vns aber ist sie gewis gnug / weil sie nirgent widder die schrift/sondern der schrift gemesse ist.

Auffs sechste / Weil Gott seinen bund mit allen Heiden macht durchs Euangelion/vnd die tauffe zum zeichen einsetzt wer kan da die kindlin ausschliessen: Hat nu der alte bund vnd das zeichen der beschneitung Abrahams kinder gleubig gemacht/ also das sie Gottes volck waren vnd hiessen / wie er spricht/ Ich wil deines samen Gott sein. So mus viel mehr dieser newe bund vnd zeichen so kressftig sein vnd zu Gottes volck machen/die/so es annemen. Tu gebent er/alle welt solle es annemen/Auff solch gebot (weil niemand ausgeschlossen) teuffen wir sicher vnd frey yderman / auch niemand ausgeschlossen/on die sich dawidder setzen / vnd solchen bund nicht wollen annemen. Wenn wir seinem gepot nach/yederman teuffen/so lassen wir yhn sorgen/wie die teufflinge gleuben/Wir haben verthan/wenn wir predigen vnd teuffen. Haben wir nu nicht sonderliche sprüche/die von den kindern zu teuffen sagen/so wenig auch sie haben sprüche / die von alten leuten zu teuffen gepieten/So haben wir doch das gemein Euangelion vnd gemeine tauffe ynn befehl/ yederman zu reichen / darynn die kinder auch müssen begriffen sein / Wir pflanzen vnd begiessen/vnd lassen Gott gedeien geben.

Summa/die widderteuffer sind zu freuel vnd frech/ Denn sie sehen die tauffe nicht an fur eine Göttliche ordnung odder gebot/sondern als were es ein menschen tand/wie viel andere  
Kirchen



Kirchen breuche sind vater dem Papst/als von saltz/wasser/  
kreuter weihen/Denn wo sie es fur ein gotliche ordnung vnd  
gebot hielten/würden sie nicht so lesterlich vnd schendlich da  
von reden/wenn sie gleich vnrecht gebraucht würde. Tu sie  
aber ynn der tollen meinung sind / das teuffen gleich ein ding  
sey/wie wasser vnd saltz weihen / odder kappen vnd platten  
tragen/So faren sie heraus/vnd heissens ein hunds bad Item  
ein hand voll wassers / vnd der grewlichen wort viel mehr/  
Gleich als wer das Euangelion fur recht Gottes wort helt/  
der lesters freilich nicht/ob gleich viel sind/ die es nicht glau-  
ben noch annemen/odder auch felschlich brauchen. Wer es  
aber nicht fur Gottes wort hielte/der würde leichtlich auch  
so her faren/lestern vnd sagen / Es sey fabel / mehrlin odder  
narren teidinge/vnd der gleichen/Vnd solt leicht geschehen/  
das er schüler kriegt/die solchen lester Worten glaubten.

Denn das soltestu wol sehen/Wenn die widderteuffer het-  
ten sollen zu erst mit gutem grunde yhre meinung beweisen/so  
hetten sie nicht viel lente verfuret noch an sich bracht/ Denn  
sie haben nichts bestendiges noch gewisses fur sich/Aber das  
mit bringen sie viel lente an sich/das sie grosse prechtige lester  
wort füren widder die teuffe/Denn der teuffel weis wol/das/  
wenn der tolle pobel prechtige lester wort höret/so felt er zu/  
vnd glaubet flux/fraget nicht weiter/nach grund odder vrsach-  
che. Als wenn sie hören sagen/ Die tauffe ist ein hunds bad/  
vnd die teuffer sind falsche vnd bübische bader knechte. So fa-  
ren sie daher/ Ey so las sich der teuffel teuffen/Vnd Got schē-  
de die falschen bader knechte 2c. Das ist denn yhr grund/da  
stehen sie auff/vnd haben sonst nichts mehr damit sie die tauff  
anfechten. Denn alle die ich gehöret habe/ Ja mit mir von sol-  
chen sachen reden/ Wenn diese prechtige lester wort (Hunds  
bad/Bader knecht/ Hand vol wasser 2c.) sind aus gewesen/so  
sind sie gestandē/als die beschorē menlin/vnd ist nichts mehr  
dahinden



hinden gewest/damit sie yhren yrthum beschirmen.

Aller dinge/ gleich wie der teuffel die Sacrament lesterer auch betreugt/ Denn weil er wol fület/ das er nichts gewisses kan auff bringen/ für seine lügen/ feret er zu/ vnd fullet zuuor dem tollen pobel die ohren mit solchem prechtigem lestern/ das vnser Sacrament sey ein fleisch fressen vnd blut sauffen/ vnd der gleichen/ Wenn die selbigen prechtigen wort aus sind so hat als bald alle yhre kunst auch ein ende/ vnd sage die weil von Christus hymelfart 2c. Eben also thun die Juden heutiges tages/ das sie yhre kinder bey yhrem glauben erhalten/ lestern sie Christum greulich/ heissen yhn/ Thola/ vnd liegen getrost von yhm/ Das schreckt denn ein vnschuldig/ einfeltiges hertz ab/ vnd verfuert/ wie Sant Paulus spricht Roma. 17. Darumb haben sie allzumal gut thun/ weil sie mit prechtigem lestern die leute können füren/ wie sie wollen/ vnd dürffen yhres yrthums keinen gewissen grund anzeigen/ Wenn sie aber zuuor yhr ding bestendiglich vnd wol gegrundet hetten / da gieng es denn wol hin/ das man der lügen gute schlappen gebe vnd strieche sie mit rechter farben aus.

Weil aber wir wissen/ das die tauffe ein Göttlich ding ist/ von Gott selbs eingesetzt vnd geboten/ so sehen wir nicht anff den misbrauch der Gotlosen menschen / sondern einfeltiglich auff Gottes ordnung/ Vnd finden also denn/ das die tauffe an yhr selbs ein heilig/ selig/ herrlich/ hymelisch ding ist/ ynn allen ehren/ mit furcht vnd zittern zu halten/ gleich wie alle andere Gottes ordnung vnd gebot / als denn auch billich vnd recht ist. Das aber viel leute der selbigen misbrauchen/ ist der tauffe schuld nicht / Man wolt denn auch das Euangelion ein faul geschwezt lestern/ darumb/ das viel sind/ die sein misbrauchen/ Weil denn die widderteuffer nichts für sich haben/ das ich noch gesehen vnd gehört habe/ denn eitel prechtige lester wort so sol sich billich ein yederman für yhn schewen vnd hüeten/

§ als die



als die teuſſels gewiſſe boten/ ynn die welt geſchickt / Gottes wort vnd ordnung zu leſtern vnd verkeren/ auff das die leute ia nicht dran glauben vnd ſelig werden/ Denn ſie ſind die vogel/ ſo den ſamen auffreſſen/ der an den weg geſet wird Mat. 13.

Vnd zur leze ſage ich das/ Wenn gleich yemand nie getauſt were/ wuſte doch nicht anders odder glaubte ſtarck/ das er recht vnd wol getauſt were/ ſo wuͤrde yhm ſolcher glaube dennoch gnug ſein/ Denn wie er glaubt / ſo hat ers fur Gott/ Vnd iſt dem glaubigen alle ding m̄glich ( ſpricht Chriſtus ) Vnd ſolchen k̄ndte man nicht widerumb teuſſen/ on fahr ſeines glaubens / Wie viel weniger ſol man die widerumb teuſſen/ die gewis ſind/ das ſie getauſt ſind? Gott gebe/ ſie haben dazumal geglaubt odder nicht / Denn die widderteuſſer verm̄gen nicht gewis zu ſein/ das yhr widderteuſſen recht ſey Weil ſie auff den glauben yhr widderteuſſen gr̄nden / welchen ſie doch nicht wiſſen k̄nnen/ vnd alſo des vngewiſſen ſpielen mit yhrem widderteuſſen. Tu iſt es ſunde vnd Gott verſuchen/ wer ynn Ḡtlichen ſachen vngewis vnd zweuelhaſſtig iſt/ Vnd wer vngewiſſen wahn/ fur gewiſſe warheit leret/ der leuget eben ſo wol/ als der offentlich widd die warheit redet Denn er redet/ das er ſelbs nicht weis / vnd wils dennoch fur warheit haben. Wenn ſie aber auff Gottes beſelh vnd gebot/ das teuſſen gr̄nden wolten/ ſo wuͤrden ſie bald ſehen/ das die widdertauff kein n̄tze noch not were / weil dem Ḡtlichen gebot ſchon zuuor gnug were geſchehen mit der erſten tauſſe.

Dazu ſo leſtern vnd verlencken ſie auch Gottes gebot vnd werck/ Denn weil die erſte tauſſe Gottes gebot iſt / vnd dem ſelbigen mit der that gnug geſchehen iſt / vnd ſie doch ſagen/ Es ſey vnrecht vnd ein Hunds bad/ Was iſt das anders geſaget/ denn Gottes gebot vnd werck ſey vnrecht vnd ein Hunds bad?



bad: Vnd sagen daz solchs ans keinem andern grund / denn  
das sie den glauben wollen ynn der tauffe gewis haben / Vnd  
können yhn doch nicht gewis haben / Das heist vmb vngewis-  
sen wahn Gottes gewisses gebot vnd werck freuelich vnd  
schendlich verleucktet vnd gelestert.

Ich setze aber gleich / das die erste tauffe on glauben sey /  
Sage mir / welchs vnter den zweien / das grössert vnd furnes-  
mest sey / Gottes wort / odder der glaube? Ist nicht war? Got-  
tes wort ist grösser vnd furnemlicher / denn der glaube / Sin-  
temal nicht Gottes wort auff den glauben / sondern der glau-  
be auff Gottes wort sich bawet vnd gründet / Dazu / der glau-  
be ist wanckelbar vnd wandelbar / Aber Gottes wort bleibt  
ewiglich. Weiter sage mir / wenn eins vnter diesen zweien sol  
ander weit werden / Welchs sol billicher anderweit werden?  
das unwandelbar wort / odder der wandelbar glaube? Ist ni-  
cht also? das billich der glaube anderweit werde / vnd nicht  
Gottes wort? Es ist ia billicher / das Gottes wort einen an-  
dern glauben mache (so zuvor kein rechter da gewesen ist)  
denn das der glaube anderweit das wort mache / Weil sie denn  
bekennen müssen / das ynn der ersten tauffe nicht an Gottes  
wort / sondern am glauben mangle / vnd nicht ein ander wort  
sondern ein ander glaube not sey. Warumb handeln sie denn  
nicht viel mehr / das ein ander glaube werde / vnd lassen das  
wort vnerendert? Sol nu Gottes wort vnd ordnung darumb  
vnrecht heissen / das wir nicht recht dran glauben? So wils  
langsam vnd selten ein recht wort werden. Wenn sie nu gleich  
yhrem eigen dincckel recht thun wolten / so solten sie nicht eine  
widdertauffe / sondern einen widderglauben anrichten / Denn  
die tauffe ist Gottes wort vnd ordnung / vnd darff keines wid-  
derwerdens odder anderwerdens / der glaube aber darff wol  
eins anderwerdens / ( wenn er nicht da gewesen ist ) darumb  
solten sie billich widderglaubler / vnd nicht widderteuffler sein /

S ij wenn



wenn sie auch gleich recht hetten/ als sie doch nicht haben.

Weil denn solche teuffler yhrer sachen aller dinge vngewis  
sind/ darynn sie auch als lügener befunden werden / verleu-  
cken dazv vnd lestern Gottes ordnung/ aus vngewissem lügen  
wahn/ vnd keren das hinderst zu fodderst / gründen Gottes  
wort vnd ordnung auff menschen werck vnd glauben/ suchen  
auch tauffe/ da sie glauben suchen solten/ vnd werden also als  
die yrrigen/ vngewissen/ verkerte geister vberzeuget/ wird sich  
ein iglicher frummer Christ / bey seiner seelen seligkeit wol fur  
yhn hieten. Das helff vnd gebe Christus vnser Herr/ Amen.

So viel wollet ygt ynn der kirtz vnd eile fur gut nemen/  
Denn ich dieser zeit anders zu thun/ mich nicht ganz ynn die-  
se sache geben kan/ Auch / wie gesagt ist/ ich noch nicht ganz  
yhren grund weis/ Denn der teuffel ist zornig/ vnd wirfft das  
hundert yns tausent/ vnd richt so macherley gewirre an / das  
schier niemand weis/ was er gleubt. Die widderteuffer haltens  
mit den Sacraments feinden / das eitel brod vnd wein ym  
abentmal sey. Widderumb halten die Sacramenter anders  
von der tauffe/ denn die widderteuffer/ So sind auch die Sa-  
cramenter vnternander nicht eins / desselbigen gleichen die  
widderteuffer auch nicht vnternader eins/ On allein auff vns  
vnd widder vns sind sie eins/ Gleich wie das Bapstum ynn so  
vnzliche rotten der pfaffen vnd münche zurtrennet/ sich selbs  
vnternander bisher frassen / vnd nu allzumal vber vns eins  
werden. Weltliche Fürsten vnd herrn auch also/ Es mus Pila-  
tus vnd Herodes vber vnd widder Christum eins werden/ die  
sonst tod feind an einander sind. Doch ist der widderteuffer  
yrthum leidlicher / denn der Sacramenter ynn diesem stück/  
Denn die Sacrameter machen die tauffe ganz zu nicht/ Aber  
diese machen sie new/ Da ist doch noch hülffe vnd rat/ das sie  
zu recht komen mügen. Wolan/ Es ist doch so viel ausgericht  
das die widderteuffer vngewissen wahn vnd glauben haben/  
vnd sie yhr ding nicht beweisen. Denn



Denn auch der Satan durch alle Schwermer ytz nicht mehr  
thut/denn das er eitel vngewis ding auff bringet/ Vnd meis  
net/es sey genug/wenn er könne hoffertiglich vnd verechtlich  
von vns reden/als die Sacraments Rotten thun. Da wil kei  
ner seinen dünckel gewis machen vnd beweisen./Aber alle yhre  
mühe ist/das sie vnsern verstand mochten verdecktig vnd vn  
gewis machen. Suspitiones docent/ non fidem. Vnd heissens  
denn schrift vnd Gottes wort./Denn der Teuffel sihet/das er  
widder die helle sonne der warheit nichts kan / darumb webt  
er ym den staub/vnd wolt gerne einen nebel fur vnsern augen  
machē/das wir das liecht nicht sehē solten/Vnd ym nebel helt  
er vns eitel yrrer wissche für/das er vns verführe/Das ist/  
weil sie yhren dünckel gefasset haben/versuchen sie  
sich/wie sie schrift drauff reimen / vnd mit  
den haren hinzu zihen/ Christus aber/  
so bisher vns trewlich beigestans  
den hat/wolte furder den  
Satan vnter vnser  
fusse treten/  
vnd euch  
alle  
behüeten/  
auch fur ewers  
Tyrannen vnd Landes  
christs verfurunge/vnd gnedig  
lich zu seiner freiheit helffen / Amen.

Bedruckt zu Wittenberg durch  
Hans Weifs.



Faint, illegible text, likely bleed-through from the reverse side of the page.

Einmütig  
und  
alle  
bedenken  
und für  
Lieberen und  
Christen  
ist in jeder  
Freiheit

Einmütig  
und alle





Mbb. 47. (8)









L  
Tb 3660

ULB Halle 3  
003 584 887




f

sb.



mt.











7.

78

Mhb. 47. (8)  
Mhb. 47. (8)

